

16 NOV 2000

Apec-Kemeja

PEMIMPIN APEC PAKAI KEMEJA SUTERA KELUARAN PUSAT TENUNAN DIRAJA

Oleh: Ahmad Fuad Yahya

BANDAR SERI BEGAWAN, 16 Nov (Bernama) -- Pemimpin-pemimpin Apec yang memulakan perentian mereka di Jerudong Park Polo Club dekat sini, berjalan sejauh 300 meter melalui jalan masuk ke kelab itu apabila mereka berhenti untuk makan tengah hari, dengan itu membuka peluang kepada media untuk mengambil gambar mereka.

Pemimpin pertama yang keluar dari bangunan kelab itu ialah Sultan Brunei Sultan Hassanal Bolkiah, yang diapit oleh Perdana Menteri Malaysia Datuk Seri Dr Mahathir Mohamad di sebelah kanannya dan Presiden Rusia Vladimir Putin di sebelah kirinya.

Mereka diikuti di belakang oleh Ketua Eksekutif Hong Kong Tung Chee Hwa, Perdana Menteri Singapura Goh Chok Tong, Menteri Luar Kanada John Manley, Perdana Menteri New Zealand Helen Clark, Presiden China Jiang Zemin dan Presiden Indonesia Abdurrahman Wahid.

Presiden Joseph Estrada dari Filipina menaiki "buggy golf" sehingga pintu masuk menuju ke Royal Brunei Golf and Country Club, tempat mereka menjamu selera.

Presiden Amerika Syarikat Bill Clinton dan pemimpin-pemimpin lain kecuali Perdana Menteri Thai Chuan Leekpai dan Presiden Peru Alberto Fujimori, merupakan antara yang terakhir keluar dari rumah kelab itu.

Menurut pegawai Apec, Chuan dan Fujimori telah mengadakan mesyuarat dua hala di dalam rumah kelab itu.

Pemimpin-pemimpin berkenaan, yang kelihatan segar dengan memakai kemeja sutera tangan panjang berwarna nilakandi dengan sisipan dan lipatannya ditenun dengan benang emas, semuanya tersenyum semasa melintasi lensa media.

Kemeja itu, hadiah istimewa daripada Sultan, direka oleh baginda sendiri dan dihasilkan dari Pusat Tenunan Diraja, dekat dengan Jerudong Park.

Warna jalur tenunan di sebelah kanan bahagian depan kemeja itu agak berbeza bagi setiap pemimpin. Pada sebelah kiri bahagian depan kemeja itu ditenun dengan logo APEC 2000 dan logo itu ditonjolkan dengan warna emas.

Helen Clark, wanita tunggal di kalangan pemimpin berkenaan, memakai jaket dengan rekaan yang sama.

Menurut media Apec, Sultan Hassanal Bolkiah semasa memperkenalkan topik pada permulaan dialog itu berharap Apec akan cuba memastikan semua orang di rantau ini akan mendapat manfaat daripada globalisasi.

Apec mengiktiraf bahawa rakyat merupakan aset paling berharga. Pelaburan yang mencukupi dalam latihan dan pendidikan akan mempersiapkan mereka bagi perubahan, membantu mereka memaksimumkan potensi mereka untuk mengambil peluang dan memanfaatkan sepenuhnya daripada globalisasi, titah baginda.

Mesyuarat itu diadakan secara tertutup dengan kawalan ketat.

Baginda turut menekankan mengenai perlunya bagi Apec untuk memberikan penjelasan kepada rakyat rantau Asia Pasifik mengenai semua langkah dan pelaksanaan oleh Apec bagi mengelakkan persepsi negatif mengenai globalisasi.

-- BERNAMA

AFY ZS RHM NMO